

Marcus Weber dat nov schlantsch a Mustér

■ (rtr) Dapi il fanadur 2014 è Marcus Weber l'acziunari principal da las Penderas Mustér. Dapi lura è gia vegni investì en l'hotel Catrina Resort ed en ils stabiliments a Caischavedra passa quatter milliuns francs. Ulteriurs 50 milliuns duain vegnir investids en in ressort da vacanzas cun var 700 letgs. Emprendì d'enconuscher Mustér ha Marcus Weber sco giuvenot che ha dà dus envern scola da skis per Giuventetgna e sport en il territori da skis da Mustér ch'era gist vegnì avert. Malgrà che sia mamma è da Zuoz ed el ha parentella en l'Engiadina è el pli tard sa decidì da cumprar ina abitaziun da vacanzas a Mustér.

Creschì si è Marcus Weber ils emprims onns en la Svizra romanda e lura è a scola a Basilea. Suentar ha el fatg l'emprendissadi tar ina fatschenta fiduziaria e lavurà suenter la recruta en il Tessin ed era fatg là il diplom federal da contabilist. Oz è Marcus Weber en var 40 cussegls d'administraziun. Quai saja uschia perquai che bleras interpresas svizas hajan già ils onns 90 difficultads ed hajan stuì vegnir sanadas, declera il cussegliader d'interpresas e finanzas a Radiotelevisiun Svizra Rumantscha. «Bleras interpresas hai jau cusseglià e cunzunt era ti-

munà ad interim.» Las interpresas hajan era savens duvrà chapital per vegnir da surviver e lura sajan ins sa participads, declera Marcus Weber vinavant. Ils cumpraders da las interpresas èn la finala stads cuntents cun la lavur che Marcus Weber aveva fatg e perquai hajan quels vulì ch'el restia en il cussegl d'administraziun. «Londeror èn la finala sa dadas malizias», raquinta Marcus Weber.

Interpresas ston purtar sa sezzas

Sco um da fatschenta ha Marcus Weber vis ch'ì steva tut airi a Mustér. Suentar che l'antierur directur da Las Penderas Mustér, Urs Häfliger, ha manegià ch'el pudessia surpigliar las penderas e lura marschassi puspè ina giada insatge, sajan sa dadas emprims discurs per surpigliar las penderas. «Sch'ins viva en ina regiun, lura vul ins era che l'economia sa sviluppa», ha ditg Marcus Weber, il cussegliader d'interpresas e finanzas

Igl è l'emprima interpresa da quest gener en la quala Marcus Weber ha investì daners. I n'è tuttavia betg in engaschi idealistic. La finamira è che tant las penderas sco er il resort planisà portian sa sezs e genereschian in gudogn per uschia pudair far cuntinuadamain las investiziuns necessarias.



Marcus Weber è l'acziunari principal da las Penderas Mustér.